

schule führen, den Sohn Gottes vnd Herrn Himels vnnnd Erden. Gott erbarmt, das niemand solchs sehen noch hören wil!

Zvm dritten, so sol der Antichrist verbieten, ehelich zu werden vnd die speise zu meiden, welchs der Babst reichlich mit voller macht vnd gewalt erfül-
 5 let hat, das er nicht allein den geistlichen die ehe verboten, sondern auch jhnen die angefangene ehe nach gewonheit der alten Ersten Christlichen Kirchen mit gewalt des Bans vnd des schwerts aus eingebung des Teuffels abgedrungen hat, wie die historien klerlich zeugen.

Daraus schleust sich gewaltiglich, das der Babst der rechte, ware Antichrist
 10 ist, welchem kein Christen kan noch sol gehorsam sein bey seiner Seelen seligkeit.

[D 4v:] Derhalben ehr auch kein Pfarher noch Bischoff ist, vielweniger der oberste.

Das aber das INTERIM sagt, Petrus habe gewalt vnd macht vber die andern
 15 Aposteln empfangen, ist öffentlich erlogen. Denn Christus, vnser lieber Herr, sagt inn dreien Euangelisten vnd gebeut ernstlich den Aposteln, das keiner vber den andern hirschen noch regiern sol, wie das Mattheus, Marcus vnd Lucas klerlich zeugen, da Christus, vnser lieber Herr, zu den Aposteln sagt: „Vos autem non sic,“ etc. Mit diesen worten antwort der Herr Christus den
 20 Aposteln (da sie jhn fragten, wer der gröste vnter jhnen were) vnnnd gebeut jhn, das keiner vber die andern sol der oberste sein, sondern wer der gröste ist in gaben vnnnd gnaden, der sol der andern knecht vnd diener sein.¹³¹

Solchs ist alles klar vnnnd helle als die liebe Sonne, noch darff das schentliche INTERIM so frech, stoltz vnd vnuerschemt widder solche helle schrifft,
 25 gebot vnd beuehl vnser Herrn Jhesu Christi vns gebieten, das wir den Babst für den obersten Bischoff erkennen, sein gebot vnnnd gesetz halten sollen als des, der mit voller vnd aller gewalt allen andern Bischoffen sey fůrgesetzt vnnnd habe solche gewalt vnd recht, welche Petrus von Christo, vnserm lieben Herrn, mit diesen worten „Pasce oues meas“,¹³² empfangen.

Denn diese wort, „Pasce oues meas“, lauten auff jhr deutsch also: „Petre, sey
 30 ein Herr vber die an-[E 1r:]dern Aposteln vnd Bischoffe.“ Mit solcher jhrer deutung straffen sie Christum, vnsern lieben Herrn, den Sohn Gottes, vnnnd machen jhn zu eim lůgener, gleich ab ehr zuuor, da ehr sagt „Vos autem non sic,“ etc.,¹³³ falsch vnd vnrecht die Aposteln geleret hat, das keiner vber die
 35 andern ein Herr vnnnd oberster sein solt. Denn das ist jhe gewis vnnnd war, wenn dis wort „Pasce oues meas“ also, wie das INTERIM leugt vnd treugt, sol verstanden werden: „Petre, sey ein Herr vber die andern Bischoffe“, so mus vonnöten¹³⁴ jhene wort „Vos autem non sic,“ etc. erlogen sein, welchs niemand denn dem Teuffel vnd seinem INTERIM zu sagen gebüret.

¹³¹ Mt 20,25–28; Mk 10,42–45; Lk 20,24–27.

¹³² Joh 21,17.

¹³³ Lk 22,26 (Vg).

¹³⁴ notwendigerweise, mit zwingender Notwendigkeit.